

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

1 ¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxón len yúgu'të zxí'inu'. Nadxí'ida' libí'ili' tu' núnbě'ëru' le naca idútë li, en calégasö neda', pero lësca' yúgu'të nupa chinúnbě'gaca le naca idútë li ta'dxí'i libí'ili'. ² Nadxí'itu' libí'ili' tu' núnbě'ëru' le naca idútë li, le zóaléntica'sö rë'u. ³ Rinábida'-në' Dios Xuz, en Xanru' Jesucristo, Zxí'ini cazë' Dios, uzá' ládxe'ë queé'li', en huéchi' ládxe'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

⁴ Budzėjade'eda' cate' biyönda' tunbi' zxí'inu' ca naca le naca idútë li, tu' tunbi' ca na' gunná bé'enë' Dios Xuz rë'u. ⁵ Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lébisö lë na' gunná bé'enë' rë'u dza ni'te. Gunné' ral-la' idxí'iru' luzá'aru'. ⁶ Caní naca bë' nadxí'iru'-në' Dios. Naca caní channö runru' ca rnna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyónili' dza ni'te.

Nupa té'ëni ila'zí' ye'e rë'u

⁷ Lë ni riguíxjöi'ida' libí'ili', tu' chita'dá zían nupa ta'zí' yë' yödzölió ni, nupa na' bití' ta'zí' lu né'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo.

⁸ Guli'gún chi'i cuinli' para cabí initi le nadéli'li' tu' guzxí' lu na'li' Cristo, pero guli'güí' ládxi'li' idéli'li' idútë le ral-la' sí'ili' lu në'ë Dios.

⁹ Núti'tës nu riguela' nöza yúbölö, en rucá'ana xtídzë'ë Cristo, bití' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxí'inë' nu na'. ¹⁰ Channö núti'tës nu za' ga zóali', en rusedi xibá yúbölö, bití' ulébili' nu na' lídxili', en bití' guiéli' le: “Guyú'u len netu'.”

¹¹ Nu rë le: “Guyú'u len netu'”, run tsözxón nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzé'ë

¹² Sal-la' le zían ral-la' uzúaja' queé'li' lu guichi, bití' ré'ënda' uzúaja' yúgu'të lu guichi. Runa' löza guída' ga zóali', ate' güí'iru' didza' ruá'a cuinru', para gaca udzéjaru' idú ládxi'ru'.

¹³ Zxí'ininu nigula zxilu', nigula rö queë' Dios, tu'gápabi' Dios li'. ¡Ca' gaca!